

【经文信息】大正藏第 45 册 No. 1908

大乘六情忏悔 1 卷

No. 1908

大乘六情忏悔

释元晓撰

若依法界始游行者。于四威仪无一唐游。念诸佛不思議德。常思实相朽销业障。普为六道无边众生。归命十方无量诸佛。诸佛不异而亦非一。一即一切一切即一。虽无所住而无不住。虽无所为而无不为。一一相好一一毛孔。遍无边界尽未来际。无障无碍无有差别。教化众生无有休息。所以者何。十方三世一尘一念。生死涅槃无二无别。大悲般若不取不舍。以得不共法相应故。今于此处莲花藏界。卢舍那佛坐莲花台。放无边光。集无量众生。转无所转大乘法轮。菩萨大众遍满虚空。受无所受大乘法乐。而今我等同在于此一实三宝无过之处。不见不闻如聋如盲。无有佛性。何为如是。无明颠倒妄作外尘。执我我所造种种业。自以覆弊不得见闻。犹如饿鬼临河见火。故今佛前深生惭愧。发菩提心诚心忏悔。我及众生无始以来无明所醉。作罪无量。五逆十恶无所不造。自作教他见作随喜。如是众罪不可称数。诸佛贤圣之所证知。已作之罪深生惭愧。所未作者更不敢作。□此诸罪实无所有。众缘和合假名为业。即缘无业离缘亦无。非内非外不在中间。过去已灭。未来未生现在无住。故所作以其无住故亦无生。先有非生先无谁生。若言本无及与今有。二义和合名为生者。当本无时即无今有。当今有时非有本无。先后不及有无不合。二义无合何处有生。合义既坏散亦不成。不合不散非有非无。无时无有对何为无。有时无无待谁为有。先后有无皆不得成。当知业性本来无生。从本以来不得有生。当于何处得有无生。有生无生俱不可得。言不可得亦不可得。业性如是诸佛亦尔。如经说言。譬如众生造作诸业。若善若恶。非内非外。如是业性非有非无。亦复如是。本无今有非无因生。无作无受。时节和合故得果报。行者若能数数思惟如是实相而忏悔者。四重五逆无所能为。犹如虚空不为火烧。如其放逸无惭无愧。不能思惟业实相者。虽

无罪性将入泥梨。犹如幻虎还吞幻师。是故当于十方佛前。深生惭愧而作忏悔。作是悔时莫以为作。即应思惟忏悔实相所悔之罪既无所有。云何得有能忏悔者。能悔所悔皆不可得。当于何处得有悔法于诸业障作是悔已。亦应忏悔六情放逸。我及众生无始已来。不解诸法本来无生。妄想颠倒计我我所。内立六情依而生识。外作六尘执为实有。不知皆是自心所作。如幻如梦永无所有。于中横计男女等相。起诸烦恼自以缠缚。长没苦海不求出要。静虑之时甚可怪哉。犹如眠时睡盖覆心。妄见己身大水所漂。不知但是梦心所作。谓实流溺生大怖惧。未觉之时更作异梦。谓我所见是梦非实。心性聪故梦内知梦。即于其溺不生其惧。而未能知身卧床上。动头摇手勤求永觉。永觉之时追缘前梦。水与流身皆无所有。唯见本来静卧于床。长梦亦尔。无明覆心妄作六道。流转八苦内因诸佛不思议熏。外依诸佛大悲愿力。髣髴信解。我及众生。唯寢长梦妄计为实。违顺六尘男女二相。并是我梦。永无实事。何所忧喜何所贪瞋。数数思惟。如是梦观。渐渐修得如梦三昧。由此三昧得无生忍。从于长梦豁然而觉。即知本来永无流转。但是一心卧一如床。若离能如是。数数思惟。虽缘六尘不以为实。烦恼羞愧不能自逸。是名大乘六情忏悔。

大乘六情忏悔

【经文信息】大正藏第 45 册 No. 1908 大乘六情忏悔

【版本记录】CBETA 电子佛典 Rev. 1.8 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 北美某大德提供

【其他事项】本数据库可自由免费流通, 详细内容请参阅【中华电子佛典协会数据库版权宣告】
